





祭輓彙錄卷十五

祭文

維

康熙五十五年歲次丙申四月庚寅朔

越六日乙

未年家眷教小弟吳鳳翔程日瑋洪其點程應桂  
洪元憲王爨吳景濤吳治桂陳議汪瑄汪世禮呂  
大受謹以剛鬣柔毛清酌庶饗之儀致祭於

皇清誥封光祿大夫內閣中書加十二級景翁項太翁  
先生之靈而言曰嗚呼古所稱豪傑之士必有過  
人之行生益於時死述於後俾遠近聞者咸嘆息  
於其死且謂雖死如生然後足以垂不朽如我翁





者真足當此而無愧乎公少習儒業長理鹺務名聞

天子禮抗公卿說者謂若人不廢舉子業當不知其扶  
搖幾萬里也乃區區託業鹺務不無憾焉吁何其  
所見之不廣耶方公英年潛心載籍歷寒暑不少  
輟迨棘闈屢戰徒費萬言公曰功名如可得乎宜  
若所揣摩以見售矣今猶礪志待時而甘旨無供  
恐吾親不能為我待也因而棄帖括事經營熟悉  
鹽筴創業維揚不數年間家隆隆以振自是怡怡  
色養朝夕不衰以迄親之老而終哀毀過禮乃至  
純孝所格夢卜牛眠厥後體親心建祠宇不惜萬

金之費築石隄致令千室之寧鬻子者代為輸贖  
困乏者周以義田追遠得千年之遺像纘緒營三  
面之滌溪而貽謀麟趾既半列乎鵷班澤及後昆  
已均成夫儒者以故

聖駕南巡獲覲

天顏頒賜御書克食寵異非常迄今贏餘之免加勛之  
減內帑之貸帶徵之緩孰非公之老成仁厚有以  
上格

帝聰者哉而今已矣盈虛有數造物難憑百身無可贖  
之期一旦作長離之別不亦痛哉雖然嗣君以廊  
廟之偉器值



聖世之休明且孫枝英敏學遠前修正不知其將來門  
閭高大且當何如也則公洵令人歎息其死而謂  
雖死而如生矣我公真豪杰之士之不朽者乎薄  
具生芻芻申悃悃神其有知來格來歆尚  
饗

維

康熙五十五年歲次丙申夏四月庚寅朔越二日  
辛卯年家眷教弟吳禎張幹程鍾方嶷吳士鋹眷  
晚生程國棟程琦方埴汪惟龍方光選程國鍾黃  
鑑方蕙生吳瀛鮑國璋曹恭徐景亮吳廷枋汪光  
漣潘浚謹以瓣香束帛清酌庶羞之儀致祭於  
皇清誥封光祿大夫景翁項太翁先生之靈前而言曰  
嗚呼天之生才也豈必廊廟哉今

聖天子豈弟作人一時智謀雄偉非常之士固悉奮駕  
齊驅與臯夔伊呂爭烈矣顧山巔水涯魚鹽版築  
間復有伏而不出者蓋以國家臣一海內休養天



下以無事者久矣則賢靈無所用其能亦無足怪  
何獨於我太翁之寄跡兩淮而異視之哉太翁賦  
質明敏孝友根於天性少習舉子業讀書不事章  
句而倫常大義毫釐不與古人謬其行己之卓越  
已有大過人者至辨是非剖利弊雖當紛紜交錯  
不難片言決之及成功之後又恂恂謙退不自居  
以故鄉黨宗族群服其碩德而先後執事均信任  
焉迄今領袖兩淮數十年不誣也何天遽奪之速  
哉論者於是謂太翁才大而遇小不能無憾殊不  
知古今勲名功業之盛勞其事然後享其成富厚  
爵位之榮有之於身不若更得諸子孫若太翁以

鹽梅舟楫之才生太平之世有才而可不用卒之  
器識宏深當時仍未嘗不信其足以建功而立業  
則其勞逸相去何如也若夫闕閱之家拖青曳紫  
一傳再傳已耳太翁積厚流光篤生令似一以文  
章鳴鳳池絲綸典誥操一代之著作一以治績顯  
大郡含貞履潔為二千石之楷模或才高藝苑或  
聲蜚黌宮是猶晉推王謝唐重崔張里號鳴珂而  
門列棨戟也其福之久暫偏全又何如耶然則太  
翁之樂不必有勲名功業之盛而極天下之至樂  
太翁之福不必藉富厚爵位之榮而實享天下之  
全福天生太翁豈必廊廟哉楨等又何所為太翁



祭輶金錄卷五  
四  
減哉尚

饗

維

康熙五十五年歲次丙申四月庚寅朔越祭日丁酉年家眷教小弟汪時澤吳印吳長裕汪文模吳祥汪文梓李枚張濬洪如昂程奎劉鈿黃鑑洪爾禮吳之駟馬孫良黃修瑚謹以辦香束帛清酌庶羞之儀致祭於

皇清誥封光祿大夫內閣中書加十二級景翁項老年太翁之靈而言曰嗚呼世有非常之人必有非常之業偉烈豐功炳耀兩間有非常之業即有非常之遇福德名壽畢萃一身猗歟休哉我公殆其然歟公以簪纓世族家學淵源鍾歛溪之秀毓黃山



之精望如華岳泰岱可仰而不可即德如和風甘  
雨披拂浸潤而不知學如江海之廣未可名以支  
派之一曲行如布帛菽粟群被服飲食而不以為  
奇故三尺之童咸能頌颺公之美而學士大夫莫  
能測其端倪嗚呼世所賴於公者至矣公誠為鄉  
國不可少之人也

聖駕南巡洞悉商罔公老成持重領袖諸君進本陳情  
天顏喜悅殊恩疊沛頒賜

御書克食曠典也非公而能得此乎公綱紀兩淮自始  
至今多歷年所其間興利除弊知無不言言無不  
當深自謙抑不少矜伐自當事以迄同儕無不服

其經濟而佩其德惠也且公之訐謨碩畫雖肆應  
無窮尤以敦本為急葺祠修墓崇祖敬宗入孝出  
弟睦族信友諸大端彰彰在人耳目至其施惠予  
德排難解紛藉藉人口公非大有得於敦詩說禮  
酌古通今其何以能如是哉蓋樸誠素具不為世  
俗浮華所誘而淹貫無所不通也至於義方垂訓  
而承歡有令子遶膝有文孫由是疊邀

地封登上壽享期頤固亦理之常無足異者耳何天不  
弔公竟棄五濁之世一去而不復返耶嗚呼痛哉  
頌德者徧閭里歎息泣下者遐邇紛紛况澤等誼  
忝桑梓情通世好能不悲哉嗟嗟老成凋謝典型



滄亡登公之堂思公之容水絕相見之期也酒醴  
在壺肴核在俎靈其來格來享嗚呼尚  
饗

維

康熙五十五年歲次丙申四月庚寅朔越七日丙  
申年家眷叔弟蘇嘉眷晚生徐國士呂士鐸洪國  
偉黃埭汪周士蘇鼎邵蘇鼎鬱蘇書石首美徐正  
議程世綺徐文開程世琮謹以瓣香束帛清酤庶  
羞之儀致奠於

皇清誥封光祿大夫內閣中書加十二級景原項太封  
翁先生之靈而言曰嗚呼天生一非常之人功業  
建於時德澤及於人其生也不易而其歿也能不  
動人之悲悼乎况嘉與翁為垂髫之交數十年來  
或余至郡城或翁來海濱浹洽者匪朝伊夕矣翁



年逾古稀余齒亦近孝悌水相隔雖不能常常而見音問則未嘗絕也今歲春聞翁抱疴小劇余以爲高年之人偶爾違和不日當霍然矣乃時維首夏忽接言音能不悲耶憶翁之幼負笈從師遊於儒宿之門提筆爲文風雨驟至每爲有司所鑒賞其取青紫如拾芥耳獨思兩親饔飧不給何忍坐寒氈以廢奉養乎於是棄咄嗟遊廣陵見兩淮鹽法之利弊雖有智者無以用其計雖有能者難以施其才翁議論縱橫侃侃立言因革興廢洞若觀火言無不當行無不濟故視齟諸公莅任必躬親諮諏其所以折衷者事未至而信其行事已至而

驗其言也兩淮人望自昔不乏如我翁者能多覲乎是以名達

### 宸聰頒賜

御書克食曠典殊榮誠不易得之遭逢也翁之才如是而翁之德尤有難能焉者人之施德由親及疎故翁篤意本源修祠以妥先靈築隄以防水患贍傭則餒者得食置田則貧者無飢他如喪葬嫁婚罔不資其所費種種惠澤罄竹難書宜其令嗣爲當代名臣而我翁

褒封極品以爲盛世更老矣吾輩方謂耄耋期頤固操券事耳奈何竟成今日之永別耶嘉等數載睽違



閩訃悽愴遙寄蕪詞少白寸悃臨風酌酒神其來  
嘗嗚呼尚

饗

維

康熙五十五年歲次丙申四月庚寅朔越六日乙  
未年家眷教弟吳焯汪徵程應桂閔志龍吳家玠  
殷明璵方士楷呂世英方中吳承夏章承棟吳承  
昇汪世孟汪詒祖洪煊汪文煜程心恭方煊然羅  
江馥程祉悅孫純祿程士燦黃瑄巴遴吳倬程枚  
程元思方謙吳儒慶謹以剛鬣柔毛清酌庶饗之  
儀致祭於

皇清誥封光祿大夫景翁項老太翁先生之靈曰嗚呼  
雲霞韜彩瑚璉斂華瑤芝委露瓊樹摧葩哲人墜  
隕歲屆龍蛇鄉邦咸戒遠邇興嗟翳惟太翁神悟



天成亢宗大器遊學武朴經書子史所業既精歸  
而就試每冠群英孺慕篤志為謀甘旨乃客維揚  
寅卯寇起竊發吾鄉聞信驚悸遠迎高堂竭力以  
事先意承將色養怡怡無間昏晝迨至棄養盡禮  
靡疚扶櫬旋歸卜塋有候孝感先靈佳城夢就安  
侑告竣出其緒餘經濟略施鹽筴是圖利之所在  
率義而趨理則治產區畫無遺建策展猷智識邁  
衆果毅措置盛朝梁棟受知鉅卿殊禮隆重垂意  
咨諏窵要悉中維持口岸表率群倫推為祭酒藉  
之主盟

聖駕巡駐清問勤勤叩陳積困緩帑帶徵恭迓

恩綸商業寢起同輩首推翁知大體縷析因革

天顏為霽頒賜褒嘉有加靡已經營備至溯本尋源崇  
祠修墓圖示後昆築堤奠居贖地安魂里閨沐惠  
中表沾恩瞻給廣施義田叙置造就人才膏火注  
意靜處閒暇法書耽嗜得句引觴唐賢席避寧馨  
濟濟爭嶺頭角佐治安靖共內閣雍雍庭階輝  
輝花萼福善匪誣食報不薄奈何蒼天竟奪老成  
波咽邗江歌寂蕪城鶻啼春冷雁唳秋清苟其不  
悲誰則無情焜等庇叨葛藟誼隆桑梓音容杳然  
典型墜矣一水盈盈難攀山趾緬想風徽中懷永  
矢敬陳薄奠用表寸心靈其不昧來格來歆尚



饗

維

康熙五十五年歲次丙申四月庚寅朔越祭日丙申年家眷訖弟胡傑楊天開何起仕楊兆麟方啓昇胡宣吳元龍趙聯英李士鍾楊家源夏士楨夏士棣李士鎰謹以剛鬣柔毛香帛庶羞之儀致祭於

皇清誥封光祿大夫內閣中書加十二級景翁老先生之靈曰嗚呼人盡有心幾人冰雪人盡有言幾人金石惟我太翁萬人之傑涉世持身惟明惟哲播其芳名遐邇稱說當其未遇何妨養拙雖有詩書棄而不屑經濟之才兼有志節十萬在胸五千在



舌可以南山可以北闕，并作鹽梅將作舟楫道以  
濟時，豈其徑捷肥遯，虛聲亦何必假借，遙望維揚  
儘堪卜宅，破浪乘風，長江一葉寄跡於茲，比於膠  
鬲目擊時艱，胸籌碩畫，援筆揮來，層層折折呈之  
巨卿，舉皆物色國用，益饒民心，亦帖網紀兩淮，獨  
為其仁。

法駕南巡

天威咫尺，陳以齟政。

聖顏喜悅，克食。

御書輝煌，陳列摩肩，聚觀聲名籍籍，若其待人光風霽  
月，不因人寒，不因人熱，推食解衣，毫不任德，至念

本宗淵源，一脉家貧而賢，眷念尤切，種種陰行德  
音，其猶宜乎，令子書香發越，磊落英多，不受羈紲，  
鳳池之班，企閨之籍，喜溢門闌，簪纓榮戟，洛社耆  
英，音容可接，綵袖勸餐，仙芝堪啜，合祝期頤，豈惟  
耄耆誰料，長征蓬萊，旦夕此日，清和空天一碧，不  
識太翁飄飄，奚適或過，緱山吹笙，一闕蕙帳空縣，  
猿悲鶴咽，獨念吾儕，久沾餘澤，鹽筴區畫實詳，而  
核視管子書，亦何以別已矣，老成無從求索，何以  
奠之，明霞翠柏，翁其來歆，一杯清冽，嗚呼哀哉，尚  
饗。



維

康熙五十五年歲次丙申閏三月辛酉朔越廿四日甲申眷晚學生汪光璉偕表姪洪社松謹以清酌庶饗之儀致祭於

皇清誥封光祿大夫內閣中書加十二級景翁項太翁老先生之靈曰嗚呼晚之未見知於太翁而從事於太翁之事已有其時及既見知於太翁而從事於太翁之事又時時而相依漉河之畔熬波之側忽聞其飄然而長逝寧無潸然出涕嗚咽而歛歔惟太翁遠大之器深沈之識其齟政之條縷瞭若列眉迄今五十載其間曰利革弊凡所以綱紀兩



泮者雖以上之人亦傾心而下諮此其聲名之播  
聞而晚之年少又何知獨是太翁之與先舅氏洪  
公升吉為友也金蘭之契無間於初終而為當今  
之所稀去年二月舅氏病卒於泰州晚自泰州扶  
柩旋葬道過邗江之湄太翁慟故人之不可復得  
念故人之淒孤心惻惻以傷悲重之以麥舟之贈  
千里百里旌搖搖而旋歸晚進見致謝始此親有  
道之光輝甫一見而怡顏頓青眼之已垂收之門  
下而不棄委之舊職而無疑夫以晚之不才而明  
者信焉方惕惕夜以繼旦庶報効之無虧曾幾何  
時乘彼白雲逍遙以去想音容之不見雖欲從之

而奚追猶憶前之仲春舅氏臨終語晚曰吾於太  
翁四世之交情未酬萬一而今亦已矣言之悽然  
以堪思豈意一歲之方週三春之未盡今又哭靈  
几而呈辭嗚呼哀哉尚

饗



維

康熙五十五年歲次丙申四月庚寅朔越宜祭之  
辰年家眷教弟吳蘭生鄭士鏊張兆琬吳森木江  
承岷查宗偕林翰黃尔勉汪釗吳之馭吳暄金鴻  
猷金元韜吳琮洪昇孫鳳鳴王楨吳曦汪遂于汪  
應春程鉉謹以清酌庶羞之儀致祭於

皇清誥封光祿大夫內閣中書加十二級耐菴項老先  
生之靈曰嗚呼士君子立身處世能存匡濟之心  
不必居其位始行其志也志得行矣雖不有其位  
而有其名且名著而祿厚身旣歿而名益彰也是  
豈尋常頌揚之詞所能盡其哀乎先生曹本聖師



門高蘭錡裕經濟之才備益寧之福名著海內凡數十年一旦脩然棄世遐邇親疎莫不銜悲蓋其功用德義及人者深自江淮南北以及京郢湖湘聞訃之日同茲震悼有哲人云亡棟梁摧折之歎是可以驗先生仁風惠澤之遠矣早擅文章兼工詞賦藝林傳誦紙貴洛陽豐於才而嗇於遇爰講治生之策仰贊軍儲離政因之而修舉國課因之而饒裕

翠華南幸喜觀

天顏計事陳情悉蒙恩鑒重叨

宸翰天廚之賜此人臣所不易得者而先生得之洵受

榮封晉階一品可謂不居其位而兼祿位之崇矣諸子

嶽立家學淵源長公首陟清途含香畫省黃扉青瑣指顧升華次公已抒岳牧之猷行建屏藩之績叔季諸君雲仍接武而又孫枝蔚起蘭玉盈階朱紱方來夔乎未艾得全全昌世所罕及惟唐之崔盧宋之韓呂庶幾近之齡邁古稀安祥而逝此人生最難得者而先生得之志既克申名將不朽可以輝映史書而傳之無窮矣夫返真觀化理數之常先生駿業鴻規麟炳若是蘭等誦服已久追慕方殷尚敢舉小善小節汎泐些辭於總幃靈几之下乎祇約言其德義之重功用之大以明先生為



國家所倚毗為吾黨所矜式為海內士君子悼失典型  
而已羈跡漢上赴弔未能虔致辨香束帛之儀遙  
陳明水江離之奠靈爽有知伏祈昭格嗚呼尚  
饗

維

康熙五十五年歲次丙申八月戊子朔越祭日巳  
丑年家眷晚生丁吉謹以剛鬣柔毛庶饁香帛之  
儀致祭於

皇清誥封光祿大夫內閣中書加十二級景翁項老先  
生之靈曰嗚呼日有晦明月有朏胸人孰不死死  
而可以無慚於衾影聲稱於當世者則雖死而猶  
生矣况夫膺富厚享大年子孫既賢一盛其於生  
人之遇良有厚幸宜若可以毋庸於戚戚然猶不  
免於咨嗟歎息焉則其人有以使之不忘也如翁  
者真其人哉翁為新安望族幼而岐嶷卓犖過其



門者皆識其爲千里駒稍長譽望大起四方之士莫不延頸願交夫以翁具穎異之才處素封之地固可以掇功名取青紫如拾芥而翁顧不屑曰士之致君而澤民者何地不可乎兩淮鹽政久敝翁以大用之才總紀綱之任國課日裕而民不困商不虧翁之才誠大而利誠溥矣至其友朋過從清談偉論終日不休即有所求無不遂其所欲被惠者不可殫數暇日執一經授諸子循循矩矩鵠峙

鸞亭迄今笠仕

朝廷皆備股肱之用文孫亦皆崢嶸頭角如薛鳳荀龍翁之樂爲何如又奚必身膺顯位而始爲榮哉嗚

呼古今不乏傳人而能無戚於生人之遇不數見即以富厚之家論或能富厚矣而未必享大年或享大年矣而子孫未必蕃衍且盡能昌大乎門庭惟翁兼而有之其得於天者不誠厚乎惟其得於天者厚故無所憂於生前亦無所憾於身後脩然長往吾知其騎黃鶴而遨遊於十洲三島間也第大雅云亡典型難再撫躬增痛曷能自己敬藉一介行李以告哀於翁之靈翁其鑒之哉嗚呼尚

饗



維

康熙五十五年歲次丙申四月庚寅朔越祭日乙未之辰年家眷晚生王三鎮沈金謹以辦香束帛清酌庶羞之儀致奠於

皇清誥封光祿大夫內閣中書加十二級景翁項太翁之靈而言曰嗚呼存歿之感倍深於一代之完人名德之隆遂著有千秋之大義東南耆舊早樹望於寰中朝野儀型何倏游夫天際惟吾太翁新安望族江左名家秀挺黃山信前生之金粟德高東海標當代之龍門紹往業於千秋擁芸緗於萬卷花生筆筦何殊玉潤珠圓波躍池邊奚啻銀鈎鍊



畫既而承顏親言定省無違眷慕松丘春秋罔缺  
友于兄弟俾裕足而後克安和洽宗親令席豐而  
始稱快斯固其錫類以能孝因心而為友也至於  
為煮海之謀膺齷政之任持籌鹽筴領南北之羣  
英措拄紛紜作兩淮之柱石

紫誥飛來於北闕秩躋崇階

翠華臨蒞於南邦親承召對以至慶流江左澤被中州  
皆士人之難能實近今之罕有凡諸操行美不勝  
書蓋承先以啓後每積厚而流光階前玉樹爭奇  
膝下芝蘭競秀聲隆

朝右勲在

工家太翁可逍遙於瑤島含笑於九京矣晚等夙叨雅  
教久切儀型方謂舉自田間策蒲輪而詣闕豈其  
箕騎天上仰南極而無輝歎靈旄之飄颺瞻素旌  
之搖曳薄陳清酒長慟寢門靈其有知庶來昭格  
嗚呼尚

饗



祭牲彙錄卷十五

祭輓彙錄卷十六

祭文

維

康熙五十五年歲次丙申四月庚寅朔越六日乙未年家眷教弟孔運隆龔敏王式喬楊祺寇鐸吉福申李溶鄭大經黃家楨張鈺劉永祉卞汝玠李紹祖李瑾郭允基申潔已楊朝極張士密張疇九王增張紹祖孔輔喬晟申鑾王與寧蔣如琰劉存宥黃經謹以剛鬣柔毛清酌庶饗之儀致祭於皇清誥封光祿大夫內閣中書加十二級景翁項太老先生之靈而言曰嗚呼棟折榱崩歎哲人之凋謝



山頽木壞失一世之典型身騎天上之箕夢化漆  
園之蜨百身莫賤悼神理之渺茫萬驥難追溯音  
容於想像此則有識同悲誰云達人齊物而微忱  
獨痛何知太上忘情也惟我太翁潏溪華胄歛邑  
名家彩筆生花夙擅江淹之譽牙籌握算遠追劉  
晏之踪不欺然諾義聲群羨夫仲由獨創規模盛  
業遽侔於端木而太翁不盈不溢持勤儉以居家  
若無若虛本謙和而待物席陳甘旨咸稱養志之  
子輿效肅義方復見訓家之公綽長公經士先生  
位崇中翰沐恩澤於鳳池次公書存先生職佐專  
城著循良於熊軾

判誥增榮於三代

恩給屢沛乎九重固已備福命之隆極衣冠之盛而太

翁履恭能安慮每深於盛滿律身以禮志無慕乎  
輕肥武侯訓子無非澹泊寧靜之言范質貽書惟  
切躁進速成之戒此誠情不移於富貴節不改於  
紛華者矣至若古道照人和風扇物恩施不吝肝  
胆無欺范文正之宗族盡贍義田孔北海之賓朋  
時傾樽酒收遺孤於草際世傳賈父之稱起飢瘠  
於桑間人惑趙侯之德時而綈袍以贈范叔則曰  
綿定奇溫時而金幣以贖文姬則曰瓶能不墜僕  
婢都以善視淵明之雅量猶存纓冠常爲解紛袁



涉之高風再著則又簡編之所難罄而今古之所罕聞者也運等凡聯縞紵共覩儀型高山仰止時深嚮往之懷雲樹迷離每切相思之槩方謂惟仁者壽行自致夫岡陵詎知跨鶴而歸遂上征夫寥廓當茲聞訃不勝摧心嗚呼長生之藥原屬虛談返魂之香止成妄想路殊山水神隨筆墨以俱馳目斷煙雲淚與椒漿而並滴靈其不昧庶式鑒之嗚呼尚

饗

維

康熙五十五年歲次丙申四月庚寅朔越五日甲午年家眷晚生汪璟謹以清酌庶饘之儀致祭於皇清誥封光祿大夫內閣中書加十二級耐菴項老先生之靈而言曰嗚呼我太翁竟溘然而長逝耶聞之古人有云死而不朽間嘗私心竊嘆以為古今來庸庸碌碌於天地間者何可勝數乃若一二有道之士方且勤修砥礪以希聖希賢而昊天不弔奪此哲人未獲大德之報於生前而徒以不朽之名慰之身後此有情者所以不能無痛也而今者太翁之逝環其訃默默乎璟兄弟之獲交於太翁



蓋二十餘年矣。其受知爲最深而風雨晦明其往來過從爲最密。其於款接之下未嘗不嘆。今世有道之君。其信莫如太翁者也。太翁以世德之胄。折節讀書。蚤擅下筆如神之譽。嗣以久淹場屋。遂挾齟策爲治生計。凡名公巨卿爭倒屣以迎。議論所發言無不中。同事者咸推爲祭酒。而要其大節所關。則若孝以事親。嚴以訓子。信以處友。和以睦宗。一言一行罔不以聖賢爲準則也。生平待人接物未嘗有疾言遽色。而花晨月夕杯酒論文。頃刻千言。光浮楮墨。在座者駭焉前此。

皇華南幸太翁慷慨陳詞而

中翰親揮溫綸屢沛觀者胥目爲亘古未有之事矣。長君經士先生躋位中翰

誥命壘列姓氏。列於鳳池。恩數榮於薇省。次君書存先生佐郡延安。時稱循良第一。遂陟階觀察。此皆太翁教誨之力。抑亦大德之報。是誠有不爽者乎。環客歲至廣陵。過太翁所見其步履如常。丰神煥發。文孫繞膝談笑自如。意謂百歲期頤行。登上壽而孰意今日遂成永訣。嗚呼哀哉。夫有盡者數也不朽者名也。以太翁之勤修砥礪。希聖希賢。自當流芳百世。與日月爭光。而獨是以景受知之深。往來過從之密。音容大語如在目前。而從此相思相見。



香不可得此何如其慘怛者而顧得以忘情之說  
相慰藉耶嗚呼哀哉酒罈之感王樹之悲洪古如  
茲臨文悲懼靈其鑒此情否耶尚  
饗

維

康熙五十五年歲次丙申四月庚寅朔越祭日內  
申表教身江之景吳森木姚鳳吳從周許邁許禮  
友方潢黃以通潘廷楫眷晚生胡良瑄何自復程  
文桂吳家珣金漢胡良佩汪爵程士燦吳景泂汪  
濤吳士昂黃文瑛胡士憲汪之茂吳鈗江松吳元  
龍黃正廉王奇偉張鐸汪安齡李弘演李溥鄭耀  
先汪濬孫以仁郝佳音等謹以剛鬣柔毛清酌庶  
饗之儀致祭於

皇清誥封光祿大夫內閣中書加十二級耐菴太翁項  
老先生之靈而言曰嗚呼玉隕西崑峰顏峻嶽薤



露朝晞德星夜浴驚梁木之已摧哀哲人之不作  
蓋賢良之喪固亦識所同悲而桑梓之親尤含哀  
而震愕百身靡贖仰珠斗以芒寒萬驥難追仿音  
徽於冥漠寄悽愴以纏繆緬芳徽之烜爍綺歲岐  
嶷學術極其醇深壯齡強立文壇推其卓犖孝友  
性成既倫常之克備聲華日上尤性情之端慤若  
群從之濟濟雅志分甘暨族姓之誥誥推恩乃博  
繪奕葉之松楸封樹無虞奠千秋之禴祀宗祠爰  
拓台崇皆之

貽贈榮貴泉臺更孝思之彌永光昭棖桷遺像來歸昔  
賢翰墨猶新滢溪重構先哲芳型如昨膏分夜課

之儒隄障千家之郭外氏之阡未復一矢解紛鬻  
宮之圯誰任兼金傾橐悲外父之嗣續無傳繼厥  
宗而恭嘗有託乃若繫心姻戚每敦分宅之仁篤  
念貧交不忘久要之約凡茲至行之可師孰非誠  
孝之所擴鹽政之利弊惟公之商確臺司式廬而  
咨濟偶須君之諾

翠華南幸獨敷奏之雍容

天語褒嘉遂

覃恩之優渥丁峻秩之頻增乃三命而愈恪五十年綱  
紀兩淮救弊補德三達尊儀型邦國廉頑立懦其  
諸措施之盛美又僕莫殫其揚摧約舉生平之踐



履蓋耽爲善之最樂用集於令子文孫不顯其弘  
規巨矱長公振剛於鳳池需次部曹仲君綰符於  
延郡游登於岳四世之箕裘競爽一門之羔鴈交  
錯是宜期頤而難老何遽上征於寥廓豈福善之  
多違抑昊天之渺邈顧其坦懷觀化曾無一事之  
可言斯其顥氣全歸自與兩間而磅礴景等素仰  
嘉茲之婆娑乍失高山之岑峒瞻總帳以涕零想  
形容於冥漠蘋藻載寒清醑載酌聊一慟以陳詞  
饗

維

康熙五十五年歲次丙申四月庚寅朔越七日丙  
申三亥者晚生陸奏偕男鍾英鍾華孫淳謹以辦  
香束帛清醑庶饁之儀致祭於

皇清誥封光祿大夫內閣中書加十二級景翁項老親  
臺老先生之靈而言曰嗚呼哀哉人生之來若夢  
人生之去如歸而富貴福澤壽考終老者寥寥也  
若我太翁備茲全福生死皆榮實無遺憾矣奏與  
太翁居同里締結姻婭先叔文如以世誼而求友  
聲交好信篤自太翁棄儒業來淮揚運籌齎策洞  
中肯綮爲當事所推崇其時先君跡寄宛汴雖未



素通情款而心共神交及己未歲攜奏詣邗上獲  
親風範款洽彌旬特加獎借因以汴濱鹽務委焉  
數十年始紘培植篤愛真至庚午追隨杖屨為時  
最久朝夕聆誨俾得開擴心胸增益智識太翁之  
教深也汴濱鹽務昔者敝甚以致負債日深人多  
苦累太翁目擊時艱請移鹽勦五單存汴疏清積  
逋口岸得以支持感德者至今籍籍不能忘也由  
此以例其餘凡因時起事規模盡善太翁之籌畫  
又可一不然乎故邀

聖恩而緩帑帶征協輿情而行仁施惠宗祖敬宗贍族  
信友彰彰在人耳目者毋容贅述惟是老成謝世  
典型何存奏世叨青目未報涓埃中心鬱鬱精神  
貫注魂夢迷離想罄欵於形影之中有不能已於  
情者不知涕泗之何從也嗚呼太翁往矣

寵錫久膺階庭蘭玉盡為國瑞指日台輔宣猷靖共王  
室澤及里閭而奏託於帡幪其榮施又寧有既耶  
敬陳薄奠聊達哀忱撫今追昔感痛何深椒漿桂  
醕庶幾來歆嗚呼尚

饗



維  
康熙五十五年歲次丙申四月庚寅朔十有三日  
壬申家眷晚生朱梓朱柟謹以瓣香束帛之儀  
致祭於

皇清誥封光祿大夫內閣中書加十二級耐菴項太翁  
之靈曰嗚呼人生如電光石火誰能無死惟碌碌  
終身業無一就良足惜耳即不然而當時則榮歿  
則已焉亦無足重輕未有生榮死哀如我太翁之  
盛德使人不能忘也太翁著姓項氏其先世牧公  
與我文公同登康熙進士世誼相承淵源固有自  
也太翁具經濟才當其東髮讀書時已隱然有國



計民生之念及長而僑寓邦江業隆煮海歷五十  
年綱紀兩淮鹺利商民永賴凡賢士大夫無不折  
節願交而上聲聞

九重恩加三錫祖父因以榮封孫子蒙其庇蔭較之守  
一經効一職者奚啻天壤况書破萬卷筆落千言  
出其所學不難博取巍科而太翁之立德立功立  
言者不在此區區章句間矣太翁之事兩尊人也  
承歡養志以仁孝稱待從父昆弟施與靡倦以友  
愛溥其修祖墓繪先塋建宗祠購遺像孝思之無  
窮又以報本追遠稱焉他若修學置田築隄除道  
更篤於宗族也而且助婚延祀惠浹嫻黨濟困扶

危澤及友朋太翁之制行卓卓垂當時傳後世者  
不可勝紀宜其年登大耋何遽溘然而長逝也乎  
雖然太翁德洽於人者深斯食報於天者厚令子  
文孫式遵庭訓或以筮仕顯揚或以英才繩武將  
再激

綸命之褒華表榮題指日可待是太翁之功名已立乎  
少也富貴已享乎壯也子孫賢達已光乎前而繼  
乎後也今年踰古稀壽考又已終乎老也人生得  
此未復何憾第梓等瞻仰有年儀型忽失追慕音  
容能不哀傷哉抑陳薄祭敬表微忱神既匪遙靈  
其來格嗚呼尚



饗

維

康熙五十五年歲次丙申四月庚寅朔越七日丙申表晚生余士齡許世齡鄭肇淑鄭彪謹以剛鬣柔毛清酌庶羞之儀致祭於

皇清誥封光祿大夫內閣中書加十二級景翁項太翁先生之靈曰嗚呼齡等忝交驩太翁數十年以僻處海濱無能時聆清誨來郡城則握手累日以申繾綣外此惟郵緘問訊以候起居耳前月齡自故鄉歸往而省視值太翁疾甚方期詰朝榻前與余永訣而薤露之歎遽入耳矣嗚呼天於太翁靳之遐算而不能錫以難老耶太翁少時落筆妙天下



器太翁者以為立取魏科躋顯仕會親老待養慨然挾策遊廣陵也當事經理齟務興利剔弊犁然具舉一時賢豪悉為俛首故深見許於鉅公屢受知於廌使焉

法駕南巡

天顏有喜曠典隆文出於意外丈夫而享大名顯當世斯亦極矣何慕於仕進不且賢於仕進者遠哉顧太翁雖為儕輩首推而處已以謙待人以厚交友以誠有所排難而非要名為人任勞而矜伐不形於色故群以為重而又樂其古道之照人也若其加意於重且大者於先塋則以次修築於宗祠則

力復舊觀於遺像則厚其直以購之不惜於從父則多伙助以恤其存亡於從昆季則授常業以期其成立廣義田之給應省試之供增石隄之築太翁之敦於一本者如此返侵奪之地不愧展甥求近宗之支延其後嗣太翁之及於外家者又如此至於義方是訓垂裕後昆既仕者功名熠燿未仕者藻采陸離孫枝秀茁皆如芝玉今且年踰古稀秩列崇階泉壤之光榮均被他日之熾昌必有過焉者安見太翁非厚得於天而必藉魏科顯仕以為赫奕耶獨太翁勤勞既久正宜優游暮齒平時書工蘇米詩駕三唐可用以陶寫性靈從此一室



自娛飲天和而歸歲月而忽捐館舍使吾輩長恨  
奉教之無期如何勿悲耶撫靈几而陳詞有不能  
已於潛然出涕者矣哀哉尚

饗

維

康熙五十五年歲次丙申六月己丑朔越宜祭之  
辰春晚生呂士昂偕男承璽謹以剛鬣柔毛清酌  
庶饗之儀致祭於

皇清誥封光祿大夫內閣中書加十二級耐翁項老先  
生之靈而言曰嗚呼人生性情之故至不可齊而  
惟知己之感中藏倍切故當其契闊經年間關千  
里而此心之肫誠甚摯者自不阻於地之遠間於  
時之久也若不幸而至於幽明異路生死分途則  
其慘慟悲號真可以動天地而泣鬼神此無他故  
知己之感爲人注情之最真而不可以僞爲也如



太翁者非晚之知己乎哉且夫知己之難莫難於  
池遠而心邇莫難於時久而志一尤難於處事之  
敗而有以諒其無他遭時之變而有以信其不渝  
太翁僑居邗江晚託足芝城地之相去千有餘里  
而推心置腹恍如覲面自結納以至今日時之相  
去十有餘年而始終如一久而能敬焉且晚以庸  
懦匪材碌碌無似雖竭駑駘之力終鮮報効之時  
所謂三戰而三北者太翁不以我為怯如此高誼  
即求之古人中亦不多得而今竟作古人耶嗚呼  
痛哉聞訃之日即欲束裝東下慟哭寢門奈體質  
孱弱因悲成疾亟期霍然就道而病轉劇展轉牀

第旋愈旋否境與心違欲報國士之知恨乏長房  
之術爰是濡泪為文以抒哀衷命兒輩為酹一觴  
他如太翁之盛德大業彪炳宇宙不獨大江南北  
奉為典型三楚西江永為矜式也令子文孫廁身  
朝右霖雨蒼生是太翁之德不特幘幘一時而且膏澤  
無窮也宜乎疊膺

紫誥受寵於

聖天子箕裘咸備篤厚於蒼天且名公巨卿折節於生  
前採風大史編錄於沒後又何俟晚之喋喋也特  
是在太翁生順沒寧全受全歸可以無所顧戀而  
亦念千里之外故人唏噓泣下之無從耶嗚呼青



尊總帳白馬蕪城以二豎之侵而不得其悲更什  
百於尋常也不識太翁其有以鑒晚之悲悰而欣  
然嘗之也尚  
饗

維

康熙五十五年歲次丙申四月庚寅朔越祭日壬  
辰眷晚生黃山羅光啓朱位唐鎮趙世俊張秉鈞  
黃時敬張琰孔師質王鉞王璉陸諫周士通藍璞  
陳國秀藍汝琰卞楷王維藩程弘坦李世祿祝順  
泰符昌麒張勝旭等謹以瓣香束帛清酌庶羞之  
儀致祭於

皇清誥封光祿大夫景翁項太封翁之靈曰嗚呼太封  
翁之於世可謂完人矣其光前裕後之謨昭昭在  
人耳目則今日遼太封翁視之如歸寧復有庸俗  
戀戀之態獨晚等叨教有年方視太封翁為矜式



而一旦喪厥老成情之所至悲曷能已惟太封翁  
簪纓世胄幼稟英敏之姿長擅端凝之譽甲寅乙  
卯之際兩尊人在堂甘旨是亟因業鹺兩淮時山  
寇竊發迎養於揚篤躬盡孝一門之內雍和輯睦  
綽有古人之風太封翁從事鹽筴每一發議動中  
肯綮且英敏果敢遇事能任當代名公卿無不折  
節願交稱道弗置前此

聖天子南巡駐蹕高旻太封翁奮然陳請加勛贏餘帶  
徵借帑得沐

皇仁殊恩疊沛非我太封翁爲之倡始烏能若是乎而  
且建修宗祠固築堤岸爲敦培根本之計歲當凶  
侵穀價騰貴鄉人之食太封翁乃法古人救荒之  
意大發賑貸種種美德難以枚舉宜乎由耄耄而  
臻期頤未有艾矣天胡不眷一旦溘然寧不痛哉  
嗣君文孫克紹箕裘登於仕籍咸推物望邀極品  
之

榮封太封翁之福祉謂非近今所罕覩者歟嗚呼太封  
翁彌留之際莫不悼痛失聲而矧晚等叨廕庇之  
下能無涕泗之橫集也哉薄具生芻用達哀忱靈  
其不爽向其鑒諸尚

響



維

康熙五十五年歲次丙申四月庚寅朔越宜祭之  
辰眷晚生金璧孫士全吳大成汪有龍程藻任天  
衡李楨許大年林之茂黃奇張志仁余化龍呂之  
仙方祥華茂江天一謝承恩陳璉朱成福喻日升  
卞弘王臣季從先周宗聖等謹以瓣香束帛之儀  
致奠於

皇清誥封光祿大夫內閣中書加十二級景翁項太老  
先生之靈曰嗚呼太翁間世竒英生而拔萃卓絕  
超群邈厥世系閱簪纓黃山間氣毓秀鍾靈惟  
我太翁賦質純良幼而穎異個儻非常讀書萬卷



一目十行下筆立就才思汪洋老成宿儒謙讓不  
遑屢念椿萱子職方將棄去帖括客於維揚經理  
鹺務處置多方同儕欽服當事稱揚名聞

朝宁頒賜琳瑯惟我太翁義田廣置學宮重新修祠葺  
廟賑飢救貧種種懿德筆難罄述天假之年廣敷  
其澤何忽驟鸞遽返仙域嗚呼蘭桂盈庭孫枝羅  
列馳驅

皇路褒封重疊太翁含笑音容如接晚等致哀臨風嗚  
咽靈爽在天庶其來格嗚呼尚  
饗

維

康熙五十五年歲次丙申夏四月庚寅朔越祭日  
壬辰年家眷晚生李之屏謹以束帛瓣香不腆之  
儀致祭於

皇清誥封光祿大夫內閣中書加十二級景翁項老先  
生之靈曰嗚呼人生電光石火中縱臻百年亦不  
過三萬六千場耳況不及百年耶然享壽雖不及  
百年而歲月不任其蹉跎事功煥乎其赫奕蓋棺  
論定人之追思弗置稱道勿衰者繫何人哉惟我  
太翁生平之嘉言懿行創業垂統彰彰在人耳目  
間者無不備極其至即使屆期頤之人歷世最久



亦未能如翁之纖微畢舉不留遺議者也翁天性  
孝友事二人則能養志友兄弟則能因心與人交  
也必誠必信有始有終戒懼常存於中澆薄不出  
於口頑懦聞之而興起豪猾見之而斂跡以故未  
與翁交者仰其高風已與翁交者沐其雅誼自翁  
捐館之後莫不歎哲人之萎而傷古道之不復見  
也蓋翁之生平出其緒餘以應當世凡人所不能  
爲者翁概以身任之爲諸人先以故兩淮之事經  
翁裁定衆心貼然非其平素秉公仗義足以服人  
曷易臻此翁精明強幹固由天賦而存心寬厚亦  
所性生持已接物如是是其所以繫人之稱道追

思者正未已也屏夙叨荷蔭一旦楷模無據雖不  
敢以哀辭絮語重傷孝子之心詎能矯世離俗強  
忍峴山之涕耶奠醑陳辭匪恭匪敬鑒誠昭悃來  
格來歆尚

饗



維

康熙五十五年歲次丙申四月庚寅朔越四日宜  
祭之辰年家眷晚生富安吳世鼎東臺常拱吉草  
堰呂化龍安豐王之韜何堞王廷臣小海張濟梁  
堞李正銳丁溪趙宗仁謹以辦香束帛清酌庶饁  
之儀致祭於

皇清誥封光祿大夫內閣中書加十二級景翁項太翁  
之靈而言曰嗚呼人生百齡猶晨昏也半岳摧峰  
俱懷未滿中河落月多抱不平其得以全歸而壽  
終生榮而死哀者蓋不可以數數見矣惟太翁浮  
丘鍾靈新安毓秀幼而穎異夙博狗齊之名長而



岐嶷遠傳卓犖之譽旣而才華練達光分霽月一  
簾器宇深沉曠若澄波千頃具有斗山聞望奚啻  
湖海胸懷共仰軼群之姿自應騰芳北闕何期達  
人之識但思高枕東山洋洋度越寰中朗朗神超  
林下加以慕義若渴資安全者萬家好善如飢頌  
恩膏者千里是以厚積必發而令嗣皆鳳舉鵬飛  
默眷多徵而賢孫更蘭芳蕙茁斯誠南都冠冕抑  
亦盛世羽儀方期福祿洊加期頤永享無何日斜  
庚子遽掩淚於長沙歲在龍蛇竟罹憂於通德里  
巷不歌乃至性也春杵不相有同哀耳鼎等久被  
廣廈之廕忽驚梁木之摧追想平生不勝沾衣之

淚緬懷疇昔殊多累牘之傷人鑒長逝百身莫贖  
德星永墜再覲無由人孰無情誰不致慟用是各  
致半芹之敬特伸一誄之私嗚呼聲蜚侍翰不謂  
不榮年過懸車不謂不壽淵源繼往早致顯揚於  
無方燕翼開來預累簪纓而未艾是公正所謂全  
歸而壽終生榮而死哀者也其亦可以逍遙於九  
京含笑於冥冥矣靈其有赫來格來歆尚

饗



祭輓彙錄卷十六





